

解師策書訣第五十

真人稽首拜唯唯請問一疑事解平言何等也天師前所與愚昧不達之生策書凡九十字謹歸思於幽室間處連日時質性頑頓晝夜念之不敢懈怠精極心竭周徧不得其意今唯天師幸哀不達之生願為其具解說之使可萬萬世貫結而不忘善哉子之難問乎可謂天人也諾真人詳聆聽為子悉解其要意師曰吾字十一明為止師者正謂皇天神人師也曰者辭也吾延上辭於天親見遣而下為帝王萬民具陳解億萬世諸承負之謫也吾者我也我者即天所急使神人也今天以是承負之災四流始有本根後治者悉皆隨之失其政無從得中斷止之更相賊傷為害甚深今天以為重憂字者言吾今陳列天書累積之字也十者書與天真誠信洞相應十十不誤無一欺者也得而眾賢各自深計其先人皆有承負也誦之不止承負之厄小大悉且已除矣一者其道要正當以守一

始起也守一不置其人曰明乎大迷解矣明為止者足也夫足者為行生行此道者但有日益昭昭不復愚暗冥冥也十一者士也明為止者赤也言赤氣得此當復更盛王大也止者萬物之足也萬物始萌直布根以本足生也行此道其法迺更本元氣得天地心第一最善故稱上皇之道也丙午丁巳為祖始丙午丁巳火也赤也丙午者純陽也丁巳者純陰也陰陽主和凡事言陰陽氣當復和合天下而興之也為者為利帝王除凶害出也祖者先也象三皇德也始者反本初也故行是道當得反上皇也四口治事萬物理四而得口者言也能日習言吾書者即得天正經字也令得其至意迺上與天心合使萬物各得其所而不復亂故言萬物理也子巾用角治其右者誦字也言誦讀此書而不止凡事悉且一旦而正上得天意歡然而常喜無復留倍也潛龍勿用欲為紀潛龍者天氣還復初九甲子歲也冬至之日也天地正始起於是也龍者迺東方少陽木之精神也故

天道因木而出以興火行夫物將盛者必當開通其門戶也真人到期月滿出此書宜按之開明之地開者闢也通也達也開其南更調暢陽氣消去其承負之厄會也潛者藏也道已往到反隱藏也勿者敢也未也先見文者未知行也用者治也事也今天當用此書除災害也玄甲歲出之其時君未能深原書意得能用之也故言勿用者見天文未敢專信而即效業用之也信用之者事立效見響應是其明證也迺與天合故響應也欲為紀者子稱餞甲天也綱也陽也飲者子也水也陰也紀也故天與地常合其綱紀於玄甲子初出此可為有德上君治綱紀也故言欲為紀也迺謂上皇天書下為德君出真經書以繩斷邪以玄甲為微初也凡物生者皆以甲為首子為本故以上甲子序出之也人得見之壽長久人者正謂帝王一人也上德易覺知行道書之人也據瑞應文不疑天道也深得其意則壽美壽者竟其天年也長者得無窮也久者久存也居天地間活而已居者處

也處天地間活而已者當學直道也浮華之文不能久活人也諸承負之厄會發皆在無實核之道故也今天斷去之也治百萬人仙可待治者正也天以此書正眾賢之心各自治病守真去邪仙可待者言天下聞之真道翕然悉出往輔佐有德之君治真道者活人法也故言仙可待也善治病者勿欺殆凡人悉愚不為身計皆以邪偽之文無故自欺治寬哉反得天重譴而生承負之大責故天使其棄浮華文各守真實保其一旦夕力行之令人人各有益其身無復自欺殆者也樂乎長安市樂者莫樂於天上皇太平氣至也乎者嗟歎其德大優無雙也長者行此道者其德善長無窮已也安者不復危亡也得行此道者承負天地之譴悉去延長安曠曠恢恢無復憂也市者天下所以共致聚人處也行此書者言國民大興云云比若都市中人也使人壽若西王母使人者使帝王有天德奸行正文之人也若者順也能大順行吾書即天道也得之者大吉無有咎也西者人人

棲存真道於胸心也王者謂帝王得案行天道者大興而王也其治善迺無上也毋者老壽之證也神之長也比若四時周反始比者比也若四時傳相生傳相成不復相賊傷也其治無有刑也九十字策傳方士九者究也竟也得行此者德迺究洽天地陰陽萬物之心也十者十相應無為文也字者言天文上下字周流徧道足也傳者信也故為作委字符信以傳之也方者大方正也持此道急往付歸有道德之君可以消去承負之凶其治即方且大正也士者有可剋志一介之人也一介之人者端心可教化屬事使往通此道也吾策之說將可親矣真人豈曉解未乎唯唯善哉善哉見天師言大樂已至矣子可謂已知之矣愚生每有所問自知積愁天師嚮不問何從得知之然子言是也賢聖有疑皆問之故賢聖悉有師也不可苟空強說也夫強說適可一言不能再轉也唯唯是以愚生不敢強說也子言是也大儒謙亦不失之也今天師事事假其路為剝解凡疑遂得

前問所不及今欲有可乞問甚不謙不知當言邪不邪疑者平言勿諱唯唯古今賢聖皆有師今天師道滿溢復當師誰乎善哉善哉子之問也可謂觀微意矣然吾始學之時同問於師非一人也久久道成德就迺得上與天合意迺後知天所欲言天使太陽之精神來告吾使吾語故吾者迺以天為師雖喻真人嚮天不欲言吾不敢妄出此說天必誅吾真人亦知此誠重耶子誠慎之唯唯愚生問疑於天師無不解者心喜常不能自禁言願復乞問一事行道之唯唯今天師比為暗蒙淺生具說承負說不知承與負同邪異邪然承者為前負者為後承者迺謂先人本承天心而行小小失之不自知用日積久相聚為多今後生人反無辜蒙其過譴連傳被其災故前為承後為負也負者流災亦不由一人之治比連不平前後更相負故名之為負負者迺先人負於後生者也病更相承負也言災害未當能善絕也絕者復起吾敬受此書於天此道能都絕之也故為誠重貴而無平

也真人知之邪唯唯可恢哉可恢哉行去勿復問唯唯

右解師策書九十字訣

真券訣第五十一

真人前凡天下事何者是也何者非也試而即應事有成功其有結疾病者解除悉是也試其事而不應行之無成功其有結疾者不解除悉非一人也善哉子之言真是也言雖少斯可解億萬事吾無以加子之言也夫欲效是非悉皆素此為法可勿懷狐疑此即召信之符也何謂也夫凡事信不信何須必當考問之也古者聖賢但觀人所行證驗也知之矣明於日月子說積善不可變易也欲知吾書悉取信效於是真人知邪唯唯行去名此為真券慎勿遺無投於下方以為訣策書章

右召信符效書證真券

太平經卷之三十九

太平經卷之四十

努力為善法第五十二

真人前天下之人凡有幾窮乎何謂也謂平無變人有幾迫窮乎所窮眾多其所窮獨無有名字邪不可名字也子未知也天下之人有四窮何謂也謂子本得生於父母也既生年少之時思其父母不能去是一窮也適長巨大自勝女欲嫁男欲娶不能勝其情欲因相愛不能相離是二窮也既相愛即生子夫婦老長顏色適不可愛其子少可愛又當見養是三窮也其子適巨可母養身使自老長不能行是四窮也四窮之後能得明師思慮守道尚可高才有天命者或得度其次或得壽其次可得須臾樂其身魂魄居地下為其復見樂何謂也地下得新死之人悉問其生時所作為所更以是生時可為定名籍因其事而責之故事不可不豫防安危皆其身自得之也真人慎之見此誠耶唯唯天師延勅以不見之言然所以勅教子者見子常有善意恐真人懈倦故明示勅之耳唯唯真人

今學以何自期乎以年窮盡為期善哉子志可謂得道意矣然凡人行皆以壽盡為期願有善惡盡耳何謂也願聞之然守善學遊樂而盡者為樂遊鬼法復不見愁苦其自愁苦而盡者為愁苦鬼惡而盡者為惡鬼也此皆靈見之事凡人可知也而人不肯為善樂其魂神其過誠重何謂也人生受天地正氣四時五行來合為人此先人之統體也此身體或居天地四時五行先人之身常樂善無憂反復傳生後世不肯反久苦天地四時五行之身令使更自冤死尚愁其冤魄是故愚士不深計不足久居也故令欲使其疾死亡於其死不復恨之也精神但自寬憐無故得愁患於此下士是故古者大賢深計遠慮知如此故學而不止也其為人君者樂思太平得天之心其功倍也魂神得常遊樂與天善氣合其不能平其治者治不合天心不得天意為無功於天上已到終其鬼神獨見責於地下與惡氣合處是故太古上聖之君延知此故努力也愚人不深計故生亦有譎於